



UCAPAN

**YANG BERHORMAT
PEHIN UDANA KHATIB DATO PADUKA SERI SETIA
USTAZ HAJI AWANG BADARUDDIN BIN PENGARAH
DATO PADUKA AWANG HAJI OTHMAN
*MENTERI HAL EHWAL UGAMA***

**DI MAJLIS SAMBUTAN NUZUL AL-QUR'AN
PERINGKAT NEGARA TAHUN 1441 HIJRAH / 2020 MASIHI**

**HARI ISNIN,
17 RAMADHAN 1441H BERSAMAAN 11 MEI 2020M**

**BERTEMPAT
DI RADIO TELEVISYEN BRUNEI,
BANDAR SERI BEGAWAN, NEGARA BRUNEI DARUSSALAM**

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ، الَّذِي أَنْزَلَ كِتَابَهُ الْمُبِينَ عَلَى رَسُولِهِ مُحَمَّدٌ خَاتَمُ الْمُرْسَلِينَ،
لِيَكُونَ هُدَايَةً لِلْعَالَمِينَ، وَمَحْجَّةً لِلسَّالِكِينَ، وَجَهَّةً عَلَى خَلْقِ اللَّهِ أَجْمَعِينَ.

وصلى الله على عبده محمد واله وصحبه الہداۃ المھدیین وسلم تسلیماً کثیراً. وبعد:

السلام عليکم ورحمة الله وبركاته

Para penonton yang dirahmati lagi dihormati –

Alhamdulillah wasyssyukru Lillah. Kita menyempati lagi berada dalam bulan Ramadhan yang berkat, *Ramadhan Mubarak*.

Kita bersyukur menyempatinya untuk menunaikan ibadah puasa dan ibadah-ibadah lainnya serta beramal kebaikan khasnya bersedekah. Khas mengenai ibadat sembahyang tarawih kita sedang melaksanakannya di rumah masing-masing dengan tetap berpahala seperti ditunaikan di masjid berikutan masjid-masjid ditutup semantara. Sesungguhnya bulan Ramadhan ini bulan yang diberkati Allah dan membawakan pula berkatnya kepada kita dan menjadikan pahala semua amal ibadat serta kebaikan yang dilakukan di dalamnya berlipat ganda.

Seterusnya kita juga akan melakasankan kewajiban membayar zakat fitrah bagi diri kita dan tanggungan kita.

Manakala kitab Al-Qur'an yang banyak dibaca pada bulan Ramadhan ini kita peringati peristiwa nuzulnya, lebih seribu empat ratus tahun yang lalu.

Kita memperingatinya sampai ke taraf peringkat negara. Itulah antara tanda-tanda betapa kita sangat memuliakannya. Kita pelajari membacanya dan memahami kandungan ayat-ayatnya.

Lazimnya sambutan memperingati *nuzulnya* peringkat negara itu kita adakan secara bermajlis khas. Namun pada tahun ini, kebetulan negara kita turut dilanda wabak COVID-19 maka sambutan itu disesuaikan dengan

keadaan berjaga-jaga dari penularan jangkitan penyakit yang telah menjangkiti jutaan penduduk dunia dan mengakibatkan kematian ratusan ribu jiwa.

Dan inilah gantinya, rancangan khasnya secara rakaman. Namun ia tetap bersignifikan.

Ia tetap ketara penting bersignifikan kerana di dalamnya ada *Titah Perutusan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah Ibni Al-Marhum Sultan Omar 'Ali Saifuddien Sa'adul Khairi Waddien, Sultan Dan Yang Di-Pertuan Negara Brunei Darussalam, sempena memperingati Nuzul Al-Qur'an*.

Maka kita sekalian sangat menjunjung kasih Kehadapan Majlis Baginda.

Kebawah Duli Yang Maha Mulia Paduka Seri Baginda Sultan Dan Yang Di-Pertuan juga telah memperkenankan supaya sambutan peringkat negara yang lazimnya diadakan setiap tahun dalam bulan Ramadhan itu pada tahun ini digantikan dengan rancangan khas. Maka inilah menyusuli titah perutusan Baginda ialah beberapa rancangan telah diatur sebagai perisianya berupa ceramah perdana oleh Yang Berhormat Pehin Datu Seri Maharaja Dato Paduka Seri Setia Ustaz Dr. Haji Awang Abdul Aziz bin Juned, Mufti Kerajaan, dan siaran rakaman Pertandingan Menghafaz Al-Qur'an.

Mengenai pertandingan menghafaz Al-Qur'an yang akan disiarkan ialah suntingan rakaman pertandingan peringkat akhir daripada lima belas (15) orang pemenang dalam lima (5) kategori.

Penyertaan pada tahun ini adalah sangat menggembirakan. Seramai tiga ratus lima puluh dua (352) orang telah menyertainya dari peringkat saringan dan peringkat separuh akhir berbanding seramai dua ratus enam puluh dua (262) orang peserta pada tahun lepas.

Sesungguhnya peningkatan yang ketara ini adalah sangat disyukuri. Ia menandakan semakin meluasnya kitab suci Al-Qur'an itu dihafaz di negara kita. Majoriti paenghafalnya adalah dari kalangan generasi baru. Mereka mendapat galakan daripada ibu bapa masing-masing dengan digiatkan pula oleh guru-guru mereka dipersekolahannya ugama. Selain itu ialah kemudahan yang disediakan oleh kerajaan Kebawah Duli Yang Maha Mulia Paduka Seri Baginda Sultan Dan Yang Di-Pertuan Negara Brunei Darussalam menerusi pengajian di Ma'had Tahfiz Al-Qur'an Sultan Haji Hassanal Bolkiah Mu'izzaddin Waddaulah dan Skim Galakan yang lumayan kepada al-huffaz yang berkelayakan dengan diperakukan oleh Majlis Tasme' Tertinggi dalam beberapa kategori hafazan.

Demikian pula di bidang usaha menyebarkan kefahaman makna dan tafsir Al-Qur'an yang mushafnya dinamakan *Mushaf Brunei Darussalam* bertulisan tangan itu telah dipertingkatkan. Bermula dari terjemahan ayat yang telah pun diterbitkan tiga puluh juz selengkapnya dan kini sudah mula disusuli dengan penerbitan jilid pertama tafsir huraian ayat-ayatnya bagi tiga juz yang awal.

Dalam usaha menyebarkan kefahaman makna ayat-ayat al-Qur'an ini, tidak dilupakan juga ialah aktiviti dan inisiatif kalangan ilmuan agama melalui *halaqah at-tadabbur* dan ceramah-ceramah tafsir yang mereka pimpin di masjid-masjid dan di institusi pengajian tinggi, termasuk rancangan yang disiarkan melalui radio dan televisyen serta media sosial.

Sesungguhnya, tidak syak lagi kesemua ini akan mendatangkan keberkatan kepada negara dalam berbagai rupa bentuk limpah kurnia Allah Subhanahu wa Ta'ala.

Dan inilah sebahagian tanda-tanda nyata kepimpinan bijaksana dan berkesan Raja berdaulat, memimpin rakyat menaungi nusa adil bahagia. Dan serentak dengan itu ialah beberapa wawasan keugamaan Baginda telah mengukuhkan Islam ugama rasmi negara dengan syiranya semakin menyerlah. Dengan itu terbukti pula betapa Islam ugama rasmi negara adalah pemangkin utama keamanan, keselamatan dan kesejahteraan negara dan rakyat serta penduduk sekaliannya.

Ini menepati hikmah Allah Subhanahu wa Ta'ala apabila mentakdirkan hamba-hambaNya yang beriman menguasai sebahagian bumi dalam artikata berdaulat di tanah airnya yakni bernegara dan berpemerintahan, bahawa mereka melaksanakan kewajiban-kewajiban yang diperintahkan oleh Allah, menegakkan hukum Allah dan nilai-nilai murni dalam berbagai rancangan *amar ma'aruf* dan *annahyu 'anilmunkar*. Firman Allah ayat 41 surah Al-Haj:

الَّذِينَ إِنْ مَكَنُوهُمْ فِي الْأَرْضِ أَقَامُوا الصَّلَاةَ وَإِتَوْا الْزَكُوَةَ وَأَمْرُوا بِالْمَعْرُوفِ
وَنَهَوْا عَنِ الْمُنْكَرِ وَلِلَّهِ عِنْقِبَةُ الْأُمُورِ

Mafhumnya:

(Iaitu) mereka (umat Islam) yang jika Kami teguhkan kedudukan mereka di bumi nescaya mereka mendirikan sembahyang dan membayar zakat serta mereka menyuruh (berbuat) yang *ma'ruf* dan melarang daripada (mengerjakan) yang *mungkar*. Dan kepada Allah jualah kesudahan segala urusan.

Maka disamping sembah junjung kasih Kehadapan Majlis Baginda, bersempena Ramadhan bulan mulia lagi berkat ini kita rafa'kan do'a

kehadhrat Allah Subhanahu wa Ta'ala semoga Allah Subhanahu wa Ta'ala sentiasa melindungi dan merahmati Baginda serta kerabat diraja Baginda dengan taufiq dan hidayah, sihat sejahtera dan aman bahagia. *Allahumma aamiin!*

Demikianlah. Diucapkan selamat memperingati peristiwa Nuzul Al-Qur'an dengan insaf mensyukuri bahawa kita umat Islam mempunyai kitab suci Al-Qur'an yang menjadi pedoman utama hidup kita. Ianya datang dari Allah yang maha berkuasa dan maha pencipta. Ianya adalah tanda rahmat kasih sayang Allah Subhanahu wa Ta'ala supaya kita melalui jalan-jalan hidup yang lurus yang diredhainya. Dan seterusnya kita mensyukuri rahmat kasih sayang Allah itu dengan semangat saling mengasihi di kalangan kita makhlukNya dan hambaNya yang mengabdikan diri beribadat hanya kepadaNya. Hal ini sesuai dengan mafhum rangkaian tujuh ayat Al-Qur'an firmanNya sebagai Surah Al-Fatihan yang sentiasa kita baca itu.

Dan akhir kalam diucapkan selamat berpuasa.

وَبِاللّٰهِ التَّوْفِيقُ وَالْهُدَايَا
وَالسَّلَامُ عَلَيْكُمْ وَرَحْمَةُ اللّٰهِ وَبَرَكَاتُهُ

- Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman,
Menteri Hal Ehwal Ugama.

Daraina – 8 Spg 530 Sg Besar,
KM 13 Jln Kota Batu, BD 2517,
Brunei.
Jumaat 14 Ramadhan 1441 / 8 Mei 2020.